

四庫全書

集部

欽定四庫全書

集部

洞麓堂集卷九

十

詳校官庶吉士臣柳邁祖

中書臣劉源溥覆勘

總校官編修臣王燕緒

校對官編修臣蕭九成

謄錄監生臣王宮

欽定四庫全書

同麓堂集卷九

明 尹臺 撰

詩類補

七言律詩

歸興二首用少宰張文邦先生韻

招隱漫懷南國士移文應笑北山羣
鄉心千里驚黃葉客夢三秋動白雲
不奈鵲鴿天際急可禁蟋蟀雨中聞

江魚向晚堪垂釣
玉鱸何時入饌分

其二

薄伎謬承金馬詔
虛名敢廁玉堂羣
羈鷹及目空絛紼
野鶴深巢但水雲
有客孤桐誰共理
故人尺素阻相聞
並飛亦是隨陽侶
霄漢那言羽翼分

遣懷用前韻二首

久狎山中猿鶴伴
翻猜池上鳳鸞羣
蓬萊晚照流仙氣
碣石秋陰動朔雲
白壁招賢成往歎
黃金好士只空聞

歲殘蘭芷能無變霜露留夷恐不分

其二

憶昨名山窺陰絕霞情霧思邈仙羣金房暗想丹牀火
玉笈虛霾石閣雲緱曲鸞驂違夙許遼西鶴使斷今聞
巖扉岳戶何曾閉咫尺煙霄路莫分

送張通政歸吳中

牙緋暫罷銀臺入繡匭誰將玉城陳范老江湖應獨念
謝公山水轉須親辭秋旅燕驚逢主背凍高鴻解趁人

此去知多張翰興鱸魚莫遣滯纁輪

舟次汶河水部李古容君枉訪因招集池亭有作
鉅野冬寒獨客舟霜天烏几對長洲忻承水部高軒過
忽為池亭竟日留江海喜通秦職貢煙霞歸問楚林丘
丈人才力原兼濟宴笑知懷天下憂

用韻東應叅政二首

十月風霜在客舟沙鷗猶戲水中洲漸看洛下賢人起
敢恨周南太史留今日朝廷誰四岳野人巾履只孤丘

甘棠況蔭江藩地折羽寧懷弱鳥憂

其二

客路相將濟水舟蘓葭楊柳亦汀洲
翛然剡曲孤航對何羨山陽累日留
性僻常懷高士社興豪欲訪羽人丘
須公事業酬明主共擬長吟消百憂

即事疊韻復答二章

海內誰當濟巨舟十年君賦白蘋洲
謝公端為蒼生起裴相休言綠野留
河朔未歸唐斥堠煙沙猶蔽漢原丘

龍翔虎躍須今日汗馬能忘西北憂

其二

甲士今歸橫楫舟南交珠翠走炎洲誰悲野哭千家是
突縱天驕萬騎留月黑青燐搖斷磧沙寒白骨挂荒丘
願提壯士從公起為挽天河洗國憂

時交州新附而西北屢失事故云

衡岳高年卷壽李給事珊祖八十

白髮蒼顏混紫冥芙蓉天柱玩蔥青幾看日月懸芝嶽
長嘯煙霞動草亭岳側合題高士社天南宜應老人星

古今八十元稱少况見聞孫揚帝庭

雨出錢塘張繕部持酒邀別有作

黯黯冬雲愁不開霏霏暮雨急相迴天寒雁起沙邊宿
歲晚人從海上来去國虞卿仍獨往憂時劉向祗空哀
因停水驛南歸棹聊醉沙村草閣梅

浙行臺山石紅梅甚奇酒中賦呈蒙泉

太湖奇石紫杈枒屈紐紅梅萬萼花香撲凍簾渾舞雪
氣烘晴院欲蒸霞高唐神女酣丹幄洛浦仙妃倚絳紗

便與暖雲成異錦共君裁賦頌春華

壬寅元日舟中作

文昌宮觀鬱天盤
鰲署仙扉切禁鑾
三十入承金馬詔
追趨常傍玉螭闌
投簪霄漢去朝遠
倚劍江湖行路難
忽憶正朝冠珮集
側身長望五雲端

何太守招遊青原病辭不赴有作

一宿青原五歲華
珠林遙望邈川霞
山中寒桂應千尺
石上古藤今幾花
擬向空門遺世想
還將淨業寄禪家

熊輔枉沐招邀使慙對秋雲滯短槎

白坡太守秋日招同諸君子游青原山寺用壁間

韻二首

病客新秋一破顏
祇園名剎舊青山
古池雲定佛心住
幽谷鳥鳴人意關
長擬鹿裘安草卧
詎期熊軾對荆班
微吟醉倚林端閣
指點江湖千里間

其二

矯首風塵暫息顏
出城車馬動秋山
短橋明月底須待

虛谷白雲殊未開杖策每懷招隱士投簪何意夢朝班

漫陪五馬娛今宴留詠青原曲水間

寺有待月橋其下曲流所出云

艾陵沈侯夙有里南石洞之約許行日踐之詩以

代招

一鶴仙亭久著名雙鳬漢殿報長征沙村車馬得無競
石洞煙霞空復情背壁丹芝含晚媚入山瑤草發冬榮
洪濤錦席飛千里轉眺諸峯邈紫清

冬日登虎塘諸山用韻答蓮坪先生二首

暖日千家散綵雲尚思仙岳訪元君未忘黃綬山中約
先遣蒼衣谷口聞司馬豪游憐獨阻仲長幽計許誰分
石田茅屋堪相老矯首同觀天地文

其二

拄杖今朝弄白雲何如春雨弔湘君山居疑有秦民避
林臥曾無蜀士聞錦石寒花尋共得瓦盆濁酒興能分
他年倘定揚雄宅不撰玄家九數文

先是蓮坪諸公約余為衡岳之游余

病不獲偕
故因及之

贈都閫督漕北征

舊帳江城虎旅分
新符水餉颯千軍
旌旗自動魚龍影
部曲元知蛇鳥文
海內誰紆劉相計
關中吾憶耿公勲
樓船將士江淮集
羨爾才猷獨不羣

穀日觀小園梅竹次彭秀才庠二首

試探園林春幾許
酷憐梅蕊故先知
看臨小閣遙思汝
折向寒籬欲寄誰
天遠微吟聊獨狎
雨殘香夢亦多時
未忘水部揚州興
苦憶仙郎迴鳳池

右梅

其二

數竹經冬青不亂高枝自可宿鸞凰那無求仲同幽徑
喜有王猷共野堂翠袖天寒愁自倚黃陵道遠悵誰將
七賢六逸豪游地矯首長雲思杳茫

右竹

伯兄以首春次文學彭君庠三詩垂示敬和志感
脉脉春簷細雨聲病餘何意訊椒罌夢回池草詩先報
思入荊花眼倍明調比古絃諧怨適音同哀玉扣幽清
彈冠未勝吹簫樂知耻吾能後薛彭

其二

閭闔祥雲萬里開
蓬萊佳氣九天迴
煙花苑陌鶯應至
冰雪關河雁幾來
憶在漢宮陪法輦
竝持春酒獻天盃
滄江一卧驚多歲
悵望文昌接上台

其三

久謝朝簪棲野徑
漫攜藜杖立江樓
虛無煙雨愁中合
想像湖山意外浮
幸有棣花得相媚
那無萱草為忘憂
春原痛灑松楸淚
霜髮晨梳忽半頭

時先日同兄弟哭
墓次晨見白髮矣

王豐城惠顧山中作

卧病滄江空復春久將名姓混垂綸
山中泉石無新侶
天上風雲有故人
豈意特煩青雀舫
蕭然遠訪白菟巾
匡扶帝業須君輩
歌詠終歸畎畝臣

次答一山宗胃見寄之作

經年誰扣草玄廬
州部陰陽信卷舒
風暖檻花粘鳥繡
雨晴堦蘚蝕蟲書
踈狂阮籍誰能那
簡傲嵇康故不除
桂樹山中攀易得
王孫招隱意何如

孔懷樓為徐草窓作

倚樓誰抱角弓悲老去元方鬢已絲
夢草青春成往事看雲白日亦多時
荆花歷歷垂新影棣萼離離偃故枝
腸斷鵲鴿偏作意孤飛背立水煙湄

移居二首

鷓鴣谿水接通津野屋蕭疎未厭貧
風暖柳條渾弄色雨晴花蕊不經春
何嫌近宅無三徑自喜端居少四隣
玩世幸容臣朔隱底須陞楮老風塵

其二

新成草閣稱幽居，況有流泉溢暗渠。
網客青蟲能狎客，鈎簾黃鳥解窺書。
南山扣角歌堪放，北闕懸珂夢已疎。
獨憶美人蓬島隔，無由江海訊雙魚。

羅宮贊達夫惠寄移居之作次答四首

一丘暫遂中林臥，數畝還成僻地居。
可愛泉聲流戶近，時看雲氣動窓虛。
川原栗里憐相似，風俗鹿門歎未如。
龐老陶公今寂寞，擬將身事寄農書。

其二

久辭禁籍尋耕隴莫問仙闌鎖祕居獨抱遺經慚究始
有懷往代恐成虛竝飛野鶴元相引數至浮鷗底自如
人意且忻諧物性未妨終日偃琴書

其三

古道欲追誰可訪今生長恨不同居煙雲蓮洞青春靜
花鳥桐臯白日虛晚接襟懷知茂叔早慚詞賦慕相如
向披尺素傳雲鯉閉戶曾聞息著書

其四

已謝榮名甘草茹真成幽跡抗林居御風列子泠然善
隱几南棊塔爾虛祇笑儒流遺自性竟從禪諦覓真如
玄珠象罔迷求索始悟斲輪欲棄書

西昌別陳子虛符卿

肝膽平生問幾投夫君高誼故無儔堪憐紫閣同歸日
竟混青門大隱流身世風塵雙短劍行藏江海一虛舟
時清鳳鳥嗟羅爵白髮商歌起遠愁

陳子虛少卿劉虞讓大尹送余廬陵誌別

長川急雨下輕舟
煙草離離自喚愁
託契漫憐年少日
論交常向古人求
陳遵舊誼推先輩
劉勰新文絕後流
早晚飛鴻過京邑
幸題尺素慰沈憂

廬陵別李年兄

楚水吳山恨不同
十年蹤迹竟西東
雲間雪草迷朱雁
白下煙花阻碧驄
長病馬卿聊暫起
多憂賈傅未辭窮
麟臺鳳閣終賢俊
佇看飛名玉甌中

題石蓮洞留別羅宮贊達夫

何年片石鑿荒萊
翠擁瑤蓮萬葉開
山曲故宜藏霧雨
巖虛莫恐動風雷
林間羽客緇經罷
寺外齋僧乞食回
相伴不妨成久臥
天書鶴隴未言催

南昌寄梅岡張翁

毘陵笑語憶先游
煙月吳門幾換秋
童稚趨庭今白髮
風塵寄迹久滄洲
仲長樂志誰能那
方朔藏身豈自由
苦恨相思不相見
何時鳴鳥慰聲求

夏日飲鄭柱史行臺

栢院淹留憐錦席水亭移酌笑言同當階草色含新雨
出樹蟬聲曳遠風三伏客行思道苦萬方民瘼感時窮
相期報主還今日攬轡看君振玉驄

右山劍泉二臺史邀集紫陽洞用前韻簡呈二首

紫陽名洞傳先宋勝日招邀帝史同瑞石秋陰長隱霧
真仙蛻化久乘風心傷妙麗窺能遍蹟入幽竒訪不窮
最是湖山稱佳興煙蘿斜日繞花驄

洞有丁
仙虬龕

其二

舊事千春靈境秘中臺乘暇騁遊同幽花自吐石林氣
古木長迴巖閣風人世多憂苦相繫仙庭有路誰能窮
徑須赤手排閭闔乞君如龍八尺驄

浙二司會宴昭慶寺簡古冲方伯二首

香林竝枉英寮駕梵閣重登華省筵雨過近郊紛甌馬
晚涼高樹亂鳴蟬風前聽笛疑凋柳煙外傳歌識采蓮
絕勝湖山饒對酒未妨痛醉擁歸鶻

其二

西湖盃酒招携日北闕冠簪侍從年久病為農虛歲月
舊遊朝士各風煙幸陪車馬青林下併接襟期白社邊
潦倒吾生虛夙志孤音政恐負朱絃

吳門別萬安朱丈

細雨高秋澹客心吳船相對古城闌幾年臥病朱絃解
長路逢君白髮侵報主微忠存敵帚感時孤憤觸危襟
分離苦易憐深誼永夜星河動越吟

彭東樓懷古一首

背郭樓孤俯漢原，憑高千里在層軒。
山園碣野諸峰出，水合彭門衆澤吞。
漢帝旌旗惟舊壘，徐王玉帛但荒村。
英雄事業銷沈易，矯首浮雲一斷魂。

贈萬鹿園總戎

將軍玉節控神州，百萬牙兵聽唱籌。
樹下屯操班虎旅，河邊抗射列熊侯。
晉卿禮樂嗟誰似，漢將壺歌羨自由。
借問三陟交羽檄，可能談笑代先謀。

壽丁東谿六十

白髮林居玩世長東谿之水即滄浪豈無仲氏如文舉
自識元公是彥方掛矢深冬緹律應吹塤新第綺筵張
旌陽丹室魚隣近鷄犬煙霞信爾鄉

東谿今中丞南谿兄也

九月十二日黃太史宅賞菊即席作

秋堂菊蕊豔新醅紅白扶疎照淺盃數室喜同韋曲里
諸公況是洛陽才誰憐令節虛前賞可少孤芳殿後開
歲歲仙僚同此醉應傳勝事在燕臺

時余寓與少村隣北

林太史以賞菊詩來示用韻并答

曾從禁苑看新菊，猶記分題賦玉堂。
紫閣十年人幾在，青山一別意難忘。
未妨寶劍花前舞，莫惜金鉤月下藏。
爛醉長安李供奉，還能染翰侍君王。

吉士館曾試
玉堂對菊詩

次傅司寇至日郊壇陪祀二首

玉衡斜柄指瑤光，子建中分動一陽。
上帝肇元尊報始，聖人履正重迎長。
緹城炬掣繁輝動，羽幕旌翻暗畫揚。
茂對紫升忻電格，天人慶協在吾皇。

其二

重臣祇祀肅元丘，戟仗森森擁道周。
敬致無文惟奠璧，禮遵貴少豈存牛。
天臨桂時祥飈轉，月下芝壇宿霧收。
歸報明禋成盼饗，應知宸豫動凝旒。

次董太史贈萬鹿園總戎之作二首

東望長淮接濟流，舳艫轉餉互神州。
才猷君過祭征虜，意氣吾憐馬少游。
畫幙天迴千里色，牙旗風颭九河秋。
中原但遣貔貅靜，莫問將軍老不侯。

其二

自古名流亦道流誰當舉步隘齊州淮南舊是神仙住
潁曲曾傳鳳鳥游浚谷芝叢紛長雨他山桂樹早知秋
相期不負丹霞約未論班生萬里侯

次詹燕峯司寇陵祀孝烈皇后詩四首

媯汭釐嶺光黼藻周南歌化盛蘋蘩空傳每出諸宮賜
無復新頒別殿恩玉几久虛彤閣幸花衣誰奉翟車尊
白楊慘澹沙河路矯首玄雲但夕繁

其二

諸陵蜿蜒翔天表列聖神遊劍履鄉一自宮衣燔秘寢
漫留禁樹鎖寒蒼麟遊瑞趾今徒詠鳳化苞文竟亦亡
摯似徽音千古頌周家王業始岐陽

其三

朱顏世婦哭金輦白首陵官掃玉宮天上靈橋應久駕
人間仙路苦無通延津劍去龍先化月宇釵傳鳳石同
手把天衣成昔夢空懸紅淚披庭中

其四

曾陪漢水翠華飛，幾兆流虹帝渚輝。
大內星辰昏繭室，永陵風雨閤禕衣。
金娥影散瑤臺馭，彤史書藏玉閣闥。
六教陰儀今不嗣，可堪神輅斷仙輦。

送王柱史按廣西

諱士翹
邑人

繡斧東行燕甸雪，牙樯春動楚江雲。
逢時可少鷹鷂志，避路應無豺虎羣。
銅柱何人留漢績，桂林今日想秦勲。
近傳蠻洞人多毒，好遣霜威破瘴氛。

送張柱史按桂州

戎馬揚旌方塞外
風煙攬轡復南中
霜旄側映丹崖日
繡節深含綠箐風
久信夷情懷葛亮
未愁漢路阻唐蒙
若言雜獠先聲策
須試諸羌不殺功

送聶文蔚先生出詔獄南歸二首

帝闕浮雲萬里開
春風繁雪霽燕臺
孤臣敢為微身計
聖主終憐天下才
夏勝傳經應自信
范滂攬轡欲誰裁
古來麟鳳無羈紲
寄語虞人莫浪猜

其二

少日論兵堪棄繻中年守郡竟投符玉闕人老無徵節
銅柱功成有訪珠夢遠江湖心獨苦身辭羅爵道何拘
冥冥花月金牛夜好理殘墟種白榆

寄草窓老人

諱慶鐘
邑人

白首行歌空復春蕭然天地一閒身酒邊象戲堪移日
壁上牛衣自曳塵帶索榮公寧歎老草玄揚子不辭貧
青山滿目橫歸思早晚從君理釣緼

老人時年
八十有三

謝王宗伯春堂夜集之作

澶淵往歲方龍臥四海秋霖劇望同憶讀昌言思仲統
幾傳蜀政識文翁風燈展席寒相藉雪院論文思不窮
山甫藻才終補袞君王神聖比重瞳

答允寧太史

自古秦中才不乏憐君藻思更無如鴻都文學先經術
太史名風首計書芸帙爾繙唐秘閣菟裘吾慕楚遺墟
異時讐校成天祿定睹藜光下碧虛

登毘廬閣同諸公

落日千林散綺疏含風孤磴裊層虛吳天白雁春難至
朔塞黃雲晚自噓萬里龍庭悲畫角十年鳳閣愧文裾
登臨聊共蓬山侶徙倚闌干興一舒

送徐柱史按滇南

金閨曾是薄仙僚繡斧今看下碧霄
隼旆聲威傳髻月西南君長拜旌旄
百年盛業毘池戰萬里奇勲漢柱標
六詔車書今一統荒夷馴服在仁條

壽顧御醫五十

比隣未厭過從煩
禁柳陰垂況接門
伯玉行年當艾日
越人論術見方垣
仙官霞色搖窓細
御苑鶯聲入座繁
更羨綵娛饒勝事
碧桃慈竹映華尊

寄劉州守報政歸武定

三年為政古營丘
竹馬仍迎舊細侯
故國才如公幹少
新篇誰賦子山愁
齊東宇宙通無極
海上風雲動不周
早晚黃金徵漢吏
莫因重臥減風流

送胡館兄提學廣東二首

往時出餞逢黃葉今日招攜對碧林
四海行藏誰定跡百年交好幾同心
旆搖南嶠移新節舟過西江感舊吟
却憶文華偕選士飛騰半已謝朝簪

其二

炎州此去八千里禁苑相從二十年
抗節君能奮唐疏著文吾已謝揚玄
心期漫許丹青並道化茲流嶺海偏
若過江門尋昔隱釣臺秋色定澄鮮

和孫司成戲簡張黃門使汴不果

洛水高雲空爾思
春新環珮尚仙墀
桐圭未授周封典
栢杓仍陪漢會儀
赤駟馬卿能獻賦
黃門揚子亦通奇
時艱出入臣勞地
況有華才結主知

和閔翰長戲簡朱太史使楚不果

蘆芽夢澤未抽尖
柳葉江陵欲映簷
苦恨三春帆影滯
翻憐五夜柝聲嚴
更生石閣書堪校
曼倩金門楯未嫌
贈句元知非白紵
申章今擬報玄纖

送王新甫提學廣西

衣冠並送文旌出嶺海遙思繡斧勞禮化新行秦郡邑
才名舊擅漢郎曹千金市園求奇駿萬里雲霄識羽毛
若過九疑尋舜迹應知雲鳥盡簫韶

送劉虞讓移令廬江

海上絃歌動帝京十年作吏尚專城棠花舊雨沾行席
柳葉新煙映別旌豈有康衢逢壯軸即看華路振長纓
江淮農計虛多歲為問春田幾處耕

送項侍御東巡齊中

栢府霜臺暑欲流
花驄繡斧奈東游
持書合識古人意
攬轡知懷天下憂
此去蓬萊觀蜃市
應思負嶠訪鰲丘
平生壯迹縻塵鞅
送汝長歌惜白頭

送閻贊善赴南大司成二首

龍虎河山舊帝京
高皇遺構壁宮宏
翠華想像三雍幸
緹帳瞻思六館迎
四海當年流頌化
千秋此地盛才英
皋比況得名賢踐
五緯行占聚宿明

其二

坊院東西俯玉河，古槐深蔭綠雲柯。
異時辱薦雄文似，幾歲因窺馬賊多。
鳳幄侍筵辭禁直，龍樓問寢想仙珂。
此行饒對白門柳，興在蓬池煙雨波。

夏日同諸君赴王太史允寧西寺之招并別朱督

學二首

朱諱衡

相從一笑解塵衣，暑寺松陰澹閣暉。
偶爾攤經諳妙義，忽聞鳴磬發清機。
林間雨過炎氛失，苑外雲開霽色歸。

即此投閒堪悟悅奈言離思苦依依

其二

炎蒸僻地愜蕭疎況有高賢足起予錦石幽香供淨宴
冰盤素果出香厨天邊此日金龜詠海上何年玉鯉書
異域交情同一醉濟西明月問誰居

送張少卿赴南光祿

炎風朔野變新秋錦席南移亦帝州曲省儀曹辭奉引
陪都勲寺愜清修煙中晉苑朱甍影樹裏秦淮碧水流

此去定傳庾信賦鶯花回首白門樓

郊寺餞別朱督學再次允寧太史二首

傍郭塵昏曉日微出郊路靜過人稀
客停簇騎穿蘿逕僧迂禪堂啓竹扉
含濕柳煙浮席動颺空花雨入簾飛
江南秋至蓴鱸美羨爾揚帆今獨歸

其二

野外芳筵散鬱蒸花邊短劍說延陵
應知白濟霜前過不厭黃樓月下登
念別微吟成感激憂時危坐忽騫騰

十年碧水丹山夢欲往從君興未乘

拙翁六十壽詩

六十拙翁鬢未皤江湖吟臥足風波雨中客棹知津久
煙外漁竿入夢多醉去儘拚花索笑豪來時拂劍為歌
一經訓後終成業垂老歡娛奈爾何

柳亭為葉中書賦

舊業新安復武林青山住愛柳叢深一辭露葉牽春夢
幾惜煙條感醉吟翠擁鳩樓西掖暮碧藏龍舸北湘陰

十年供奉長楊館底事頻抽白玉簪

送陸進士令南昌

孟冬風雪苦蕭蕭之子懸旌悵獨遙
畿甸煙塵驚始定關河氛祲凍宜消
西山細雨三春閣南浦浮雲萬里橋
若見舊時掛冠尉為言名姓久中朝

送朱進士令浮梁

翩翩裘馬出京畿送客深冬獨掩扉
雲裏驛從三尺入雪中人向五湖歸
花開北苑鴻應至草綠南州燕不稀

此別何時成後覲好題尺素慰相違

送劉致卿太守赴任嘉興

水岸春風動綠旄煙郊柳色映朱袍
股肱暫借淮揚出水犢懸知渤海勞
列戍軍屯憂戰餉三吳民力困征漕
時艱合展平生許肯使煙塵暗呂刀

送胡劍西太史使楚藩

冰河凍柳變條初玉節遙將尺駟車
湘北暖歸花競發衡陽春過雁應疎
封唐史佚策堪載歷國延陵聘孰如

朱社菁茆千葉祚周家大訓在丹書

正元前三日習儀朝天宮值雪二首

七校儀陳羽衛閑驚看晨雪滿玄闕光含綵仗翻披外
影度朱衣拜舞間競入璇臺交御氣真成玉殿引仙班
祈壇報積千田素定豫天威咫尺顏

其二

綺陌初零暝不分琳宮向曙益繽紛旌旄併動飄揚氣
珮笏齊沾點綴文未折瑤華遺遠道空吟玉樹感奇芬

願占改歲幽農兆休問當年蔡將勲

送沈中丞撫治鄖陽

冠簪昨竝趨丹極斧鉞今省下赤霄卿月預懸鄖子國
法星先映漢臣軺諸藩賓佐多豪俊列郡風威久動搖
此去褰帷饒述作題封莫惜寄瓊瑤

送陳履旋進士奉使得省

赤駟輶軒迎遠甸錦帆青舫映長川天王歸瑁尊周典
使者持符擁漢傳岸草汀花隨興入江魚竹笋慰愁牽

懸知舊徑多三益鄉里衣冠未乏賢

送王司諫僉憲廣東

諱熾

花鳥春筵對碧灣風塵盃酒集悲歡
新交但恨相知晚直道何嗟行路難
諫獵昨章存自慰罪言今草檢誰看
應從嶺表訪銅柱還遣霜威靜海瀾

和午塘翰長春日游方氏園

春意誰同郭外尋郊園聊坐偃芳心
鳴鳩乳燕紛相趣細栢繁槐密自陰
舊國娛情虛水石他鄉隨地漫雲林

因吟秀句思芳草伐木先知懷好音

送興化李太史省覲南歸

漢殿詞臣海上歸宮袍計日拜重闈江樓煙雨迎仙棹
驛路風光動綵衣芳草淮南憐昔賦停雲燕北悵今違
清朝載筆思才傑佇聽朱絃應玉徽

送賀丞赴湘陰

長沙南去是湘陰湘水洞庭交滙深獨客懷人吟蕙葉
他年使節駐楓林

余昔奉使過湘陰

五雲側望片帆影一雨驚

懸故國心遙想過家芳草綠尺書北雁幸傳音

夜宿昌平同應少宰孫宗伯集叙用韻分贈二首

汶上相逢憶往年野航江草夢長牽青燈何意茲堂集

白髮翻傷舊鏡傳朗鑒山濤終啓事逃名李泌數歸田

龍蛇出處看公獨敢向瑤琴惜解絃

右贈容
菴應公

其二

齒髮空思乍壯年長纓赤驥頻誰牽門同陸相知虛忝
謗藉蘇公得並傳慕道喜多闕內士息機欲問漢陰田

簷花細雨深
五夜燥濕陰中識昨絃

右贈季
永孫公

用前韻簡聶文蔚大司馬

夏勝初辭漢繫年
馮唐那復宦情牽
青霄事業遺經在
白首功名治郡傳
洛下久閒司馬社
山中漫憶介推田
雅音寂寞饒新譜
清廟憐公朱瑟絃

送許元復秀才還吳中

童稚論交已二毛
相思吳楚隔風濤
空憐明月懸珠珮
未向黃塵拭寶刀
仲蔚蓬蒿貧豈厭
元龍湖海氣稱豪

此歸且理求羊逕莫學揚雄辨字勞

奉次許宗魯中允九月二日居庸佛閣同仇將軍

登宴二首

絕域煙沙莽白登憑高風日快虛澄烟烽萬里元秦塞
王氣千秋自漢陵北伐聲威方電迅西來將士已雲蒸
危關岌業青蓮宇看取三軍劍舞騰

其二

出塞嫖姚紫幕開中丞玉節此追陪香林合駐名賢履

寶積堪標上將臺谷蟲帳依高闕動桑乾水破大荒來
淹留漫聽軍中樂矯首狼胥意獨迴

朱太史得使襄藩用閔宿宗伯舊冬韻贈

峴曲千山簇碧尖大隄晴柳撲風檐仙槎信有人凌漢
卜肆那無客姓嚴舊索仍垂堪自慰長裾往曳亦誰嫌
還歸若奏東南事篚貢應言困縞纈

送李文貢金得省

號竹岡

萬里南滇指北燕驅馳貢篚足風煙黃金歎阻招材日

白髮歡承戲綵年歸興浦雲生解纜愁心江草動離絃
向來共學人今幾愧我淹棲鳳閣邊

余昔與竹岡
蓋同學云

送全太史奉使得省母致壽

玉節朱旄海曲歸金鈿白髮倚春暉人間日月開仙輓
天上風雲動綵衣甬水春波魚入饌燕河夜雨雁于飛
文華勝士今無幾莫使鵷行歎久違

送宮論王允寧視篆留院用介翁少師韻

彤垣綵筆絢繽紛鰲抃鯨吞思不羣敢擬懷珠邀漢女

漫陪鼓瑟賦湘君銀魚畫鞵秦關日畫鷁春浮濟水雲
此去三山暫延首虞韶鳳鳥定先聞

送王佐之行人使徽府因便省覲

玉節西馳指孟津桃花柳葉炫深春嵩雲併引朱旄麗
洛日遙輝綵服新茅電縮庭將漢典桐圭建國感周親
應知蔡仲光前德不負天王大訓陳

送謝茂秦

禁柳疎陰澹曉暉青春其奈送將歸煙塵近訪黃龍塞

雲海仍思白鳥磯，壯迹詩篇聊自紀。
豪情盃酒向誰揮，也知天地傷多事。
肯信扁舟易息機。

送王侍御赴南臺因便還省

爾家舊傍郢中臺，二父聲華動斗台。
歲月獨慙元禮士，雲霄向識仲容才。
花明潯北絲驄出，草綠湘西繡斧迴。

四海風塵驚在目，公車皂牘幾時開。

余昔在少泉公門，
虹唐時甫冠也。相

視為忘年友。今二十餘年，再會京師，忽復
持斧南出矣。悵念今昔，屬行聊是贈云。

初晴用韻答康莆田

娟娟晴雲天際還初秋物意倍相關疎青自映高低陌
濕翠渾流遠近山久客欲歸難引興深愁對此暫開顏
虛簾把酒吟佳句更覺羈情易破慳

太宰唐公哀詞

有引

故太宰漁石唐公清忠大節表著一代往以篤疾請
告忤上意遽譴莫抒今令子太史思濟具疏列白公
情天子哀思焉乃悉歸公卹遣官治葬祭數從渥厚
縉紳榮歎臺辱公教愛俛仰垂二十年因思濟行作

此一寓曩衷云

漢閣麒麟思畫日蕭關虎豹慕威年持衡四海方逢聖
抱疾三春忽問仙國論喜伸忠彥疏家聲應振敬夫賢
扁舟細雨南歸夕悵望風神澱水邊

余庚子秋歸別公于澱溪舟中竟成

長訣矣故云

送全太史告省得歸

海甸猶飛格鬪塵河關南望渺傷神虛傳井邑青烽暗
苦憶庭幃白髮新此去萱花歡獻綵莫攀桂樹想藏身

龍沙雁塞方多事倚劍須思叱馭人

送都諫姜公赴廣東參政

十年舊直侍龍光萬里新麾動鳥章南海元開秦尉宅
曲江舊繞相君堂青山覽古迹堪問碧草懷賢思不忘
遙想旬宣停赤駟應傳麗句遍遐荒

送呂太史侍親還桂林

華省仙裾此暫分重闌綵服曳煙氛相將杖履隨黃葉
寧復川原感白雲計日湘魚供美饌何時衡雁寄高文

南歸我動九疑興
早晚招君鸞鶴羣

送大巡吳公赴江西

銀鞍驄馬紫纓垂
賦別還同把玉卮
法從今朝辭日馭
使華若處駐霜麾
西江天淨魚龍水
南浦風凋鳥鵲枝
此去陽君隨繡斧
應知白屋少顰眉

送吳都閩赴浙鎮

將軍才氣振江東
虎竹新分向越中
組練乍明湖岸月
旌旗先掣海門風
舊都自識儀文盛
大鎮今看節制雄

見說鯨魚猶跋海須君一建伏波功

送吳太史奉使代藩

玉節金函出塞垣
朱衣白鳥照邊村
雲中吏拜孤峰驛
雪外人迎古磧屯
漢代河山新典冊
周家盤石舊宗藩
歸朝佇聽汾陰賦
莫學枚生吟兔園

送吳西張太史使江藩

京國論文幾過從
郊筵惜別奈殘冬
衝寒裘馬今朝發
獻歲鶯花若處逢
桐葉剪圭周建爵
菁茅分社漢傳封

歸將錦節停鄉邑玉筍高開紫霧重

楊太安人壽詞

主事孕賢之母

華髮金鈿相映清仙闈綵服拜長生蜀中自昔稱堯叟
洛下于今識彥明向日萱花能媚晚經冬桂樹獨含榮
霜叢滿院吟慈竹併作緱笙引鳳聲

儀真送歐君之任粵中

揚子津頭白水波送君其奈旅愁何三春澤國懷歸思
萬里江樓聽別歌青草瘴陰迷合浦黃梅雨氣接牂柯

相將竝棹重難得目極天南雲霧多

登廬山天池寺

匡廬秀出九江水攬結天池翠幾重萬壑雲開青錦繡
千峯日照紫芙蓉危林裊霧晴兼合飛瀑垂虹斷忽逢
北望長安忻在目朝氛莫遣蔽高春

佛手巖

佛手奇巖俯窈微長江雲浪漭相圍石危訝有高僧住
松老能招獨鶴歸榭葉鳴隨龕慶發藤花飄逐乳泉飛

茅菴絕壁無人見忽聽林間啓竹扉

燕子磯

燕子危磯俯帝城高秋攜眺獨含情雲中雙闕蒼龍隱
天際孤洲白鳥明放浪吾生元水石棲遲微宦漫簪纓
忻逢勝地同淹賞燈火歸輿夜柝鳴

觀音巖寺閣

危巖曲磴裊雲端峻閣穹林互鬱盤寺暝虎聞啼絕壁
江晴蛟出舞回湍羣公燕暇聊今集四海登臨此壯觀

忽憶天兵南伐日舟師幾出定波瀾

壽徐東園錦衣七十

異姓王孫今代聞風期千古信陵君神仙第宅元霄漢
賓從笙歌自水雲種竹鳳臺留客看買山燕渚與僧分
斲輪歲月從今數赤篆長開藥錄文

自大茅宮入上下二宮緬然有懷仙之感書似句
樊令及文學胡子

大茅西下華陽路石磴幽花好自開令尹青牛何處覓

仙人白鵠幾時來
星文半夜垂銀闕
雲氣中天捧玉臺
千古騎龍謠獨憶
欲從滄海問蓬萊

謁唐太史應德陳橋莊二首

一入陳橋棹即迷
深源何異武陵谿
支離未厭壺丘病
寂寞仍耽潁水栖
舊劍牀頭長綬蒯
新書案側欲嘘藜
微言更及玄筌理
不記參橫晚日西

其二

幾歲風塵海甸昏
如公那得獨衡門
焚魚學士迹空秘

衣白山人禮自尊桂樹攀援聊賦隱桃花開落竟忘言
英雄出處元無定不見南陽與渭村

辱應德枉答用韻再贈二首

十年學道與方迷退守真慙老氏谿下士誰抽青笈秘
高賢久作碧山栖三江采秀常舟楫五岳尋仙獨杖藜
強託著書能暫許五千文字定傳西

其二

妖魍吹浪海沙昏蜃浦搖氛暗國門白面書生誰解武

綠林羣盜故稱尊，握竒自識才元辨。
抱灌終知寂不言，豺虎縱橫紛在目。
可容閒臥碧雲村。

淮南九日有懷寄寶應廖明府

九日淮南繫客舟，無邊雲霧蔽滄洲。
萬方多難孤尊對，千里辭家一劍留。
木葉漫驚公子思，菊花聊慰旅人愁。
長吟忽憶神仙令，目極飛鳧天際頭。

送吳館長督學湖南

玉節東馳向楚圍，南州衿佩早知依。
洞庭春浪魚龍變，

衡岳朝陽鳳鳥歸此去舉比煩指授即看繡斧動光輝
詞才舊擅相如麗莫向梁園賦雪飛

時吳將自汴歸展墓

送劉集湖出倅廣平

柳色微黃映客衣長安雪後見春暉欲辭舊館鴻先至
正別新年燕忽歸故里經心那送遠芳郊對酒悵相違
盧龍近在邦畿內合有聲華動帝闈

送大司馬聶先生辭政南歸用少師相公韻二首

二十年来大司馬幾人得上乞休書寇公許國心元壯

范老憂時計未疎紫閣星辰辭聽履青原花竹引歸輿
冥鴻浩蕩終難慕目極江湖思渺予

其二

抱甕從來惡說機握韜今換釣綸歸功成不歎身難退
道在寧論事屢違天上心閒雲鳥陣山中夢近薜蘿衣

誰憐華省孤吟客獨倚西樓看少微

公以宅畀余
宅西有樓

送朱象元司業赴南雍

槐風麥雨颭新波三月樓船放玉河南極星辰迎珮近

舊京桃李在門多雲開鍾阜圍青錦天靜玄湖湛碧羅
欲賦重遊那可復羨君環珮到煙蘿

送費符卿奉使荆藩

十年符省侍君王幾曳銀緋到舊鄉玉節近承丹鳳詔
金函更拜紫鸞章三湘夏過黃梅雨七澤秋迎碧莢霜
莫待梁園飛雪度好馳星駟報明光

洞麓堂集卷九

欽定四庫全書

洞麓堂集卷十

明 尹臺 撰

詩類補

七言律詩

礪峯公之陟南禮侍也余在金陵日引跂然迄左
一覲茲余改北雍公入覲得覲無幾復別去不
能無慨然於中者作詩叙往用抒積思云耳

久矣金扉載筆從每嗟詞賦擅雍容那搖北固煙中旆
仍別西清雨外鐘柳曲樽壘經歲憶花邊笑語幾時逢
蓬萊出入神仙地目極天南綵霧重

南少宗伯
住柳灣

送秋官劉大夫赴常德太守

五馬長鳴碧柳煙武陵春色畫輶前青山露冕迎花入
白水飛旌映樹懸少日鹿革聯省席清朝魚藻竝宮筵

故事諸宴秩
大夫咸與論思虛薄慙何補紫綬相看華髮年

萬太宜人七十壽詩

華髮金鈿映晚暉自天綸誥下重闈懸知赤紱牽新夢
不奈斑衣阻獨歸七十宴開青雀至八千路遶白雲飛
題詩寄祝庭萱壽瑞婺光芒動紫微

送陳太史奉使淮藩便覲

龍函寵錫賁宮袍鳳藻親題白玉毫自識沂公懷素志

由來秦國望先朝

陳氏狀元及第自秦國二子叟咨始

曉雲廬岳觀飛瀑

夜雨湓城聽落潮歸拜錦堂承綵覲高車不羨蜀都橋

送亢太史提學河南

法垣華耀吐文昌斧節今辭白玉堂
嵩少風雲生氣色洛瀍草木動輝光
新銜薄試儒文效舊局同推史學長
本是紫皇香案吏仙裾竚曳御爐傍

送萬太史奉使唐藩便覲

太宰高風振盛朝羽毛羨爾接青霄
通家誼厚憐文久竝署情親惜別遥
桐葉剪圭將去節薇花照館遲歸旄
過庭正及江魚美捧饋應紓孝思勞

送興化李太史奉使衡藩便省

省元昨占西江盛館職今分東觀榮獨捧金函辭禁籞
遙將玉節下仙城幃寨海岱晴雲度旆指徐淮暑雨清
聖主恩深不可及莫吟黃葉滯秋程

八月二十七夜同年宴集內射所酒闌步東臺觀
月慨談往昔愀然興感趙文屬倡句不揣敬呈

郢削諱貞吉

二十年前舊月明長安盃酒此同傾星河影動高秋興
絃管音傳少日情四海聲華前輩老幾人功業後時名

酒闌忽感英雄事却憶終生曾借纓

宗媼譚孺人六十

雲陽佳氣動江鄉寶婺星輝映北堂競喜萱叢開晚色
更看蘭葉裊華光湘娥色應金甌轉緱女簫流綵霧長
試問瑤池宴阿母鶴鈿今數幾莖霜

自彭城入沛書感錄似張元敬水部并寄周允文
提學

余帆北指沛公鄉矯首彭城在夕陽擊筑久無秦子弟

歌風今有漢篇章千年往事河山改萬里秋歸草木蒼
井邑蕭條徒極目可堪赤甸比遐荒

壽童太夫人六十

南國朱萱開錦席仙郎遙動白雲思東征幾讀曹家賦
上壽先函魯頌辭捧日金芝含晚秀倚風玉樹發新枝
莫言萊綵違千里展覲行將鸞軸隨

贈黃子元東歸詩

有序

瑞安黃子元余總角時與之同學于吳中暨相別乃

竝在舞勺之年今寒暑忽四十二更矣子元不遠數
千里視余白下二毛相向各種種俯仰今昔不覺為
之潛涕子元將辭歸慨然有回路二子之慕問余所
以為之贈者嗟乎余何言以益子元聊作七言近律
一章志耿耿感念之積悰云耳

童稚情親竹馬前心期暗許合龍泉煙波一別三千里
雲海相思四十年往事真成傷白首清歌聊為解朱絃
即將掛紱尋仙侶定擬逢君雁蕩邊

余約子元乞歸必
扣之同游雁蕩云

秋日同大司馬張公少宗伯康公少司馬石公振
武營讌集二首

振武新營禁苑開
河山佳氣動蓬萊
洛中幸見周王制
江左誰當謝傅才
風定荷香浮几席
雨晴竹色淨樽壘
百年勝會應難數
劍舞淹留未擬回

其二

幕府亭偏暑氣微
帝郊雲物淡晴暉
虹邊雨過秋陰斷
鳥外煙橫霽色歸
歲月虛驚諸葛陣
風塵久化士衡衣

何時海上停征檄白羽青林得自揮

朱封君雙壽詩

白髮蘄川二老人綺筵開對玉臺春
赤桃東熟初成獻青雀西飛訝有神
華露暗滋孟宅竹古煙長映竇庭椿
紕泥天上頒非遠綵服行將鸞軸新

送林太常考績北上

南省清卿羽旆馳功書名奏九重
知驚看去驛梅花發想及歸輶柳葉垂
仍世史藏司馬記名都賦載左思詞

文華選士今無幾漢閣圖勲重爾期

楊南郭太史自金陵將之句容詩以送之

二十年前舊館僚風塵鸞鶴見高標
脩然句曲山中往徑赴華陽洞裏招
謝客三江竹獨泛尚生五岳詎辭勞
應逢此地飡霞侶共和騎龍白日遙

贈和楊太史用孫宗伯韻

昔年曾謁大茅君清夢長依白鵠羣

白鵠茅君事

此去緱笙

霞外待相將剡棹雪中分汲泉
碧草生春雨建業青山

隔暮雲為恨相思不相見因風好遣尺書聞

夜酌南郭太史辱以詩贈次答

白首中朝歲月深濫陪簪履在詞林許身敢比卞和璧
競世羞懷季子金裘馬故人勞問訊風塵老鬢對蕭森
青燈漫盡十年話舊事樽前不費尋

有懷大茅道室因南郭往謁寓訊

憶昔南游訪道羣幾昇元界拜元君鼎窺未煮丹鉛藥
笥閱無名蝌蚪文服氣青芝長不厭禮星玄鶴每先聞

茅龍欲借難成許空留華陽一片雲

用韻答方湛一

海內吾當愚者兄元潭一笑得平生六經誰作片言了
萬古汝留雙眼明此去風塵彈趙缺須傾江漢洗吳兵
干時學道隨能事我信安期不世情

世言安期
干時不遇

己未元日

舊京冠珮集仙扉曙色先流簇仗輝四紀昇平看舞鬢
九重端拱坐垂衣椒花頌獻宮門遠栢葉尊傳禁省違

敢以周南留滯惜但歌宵雅祝皇闡

少東錦衣燈會病不及赴次孫宗伯韻二首

信陵公子夜開堂宴客張燈水檻傍自放梅風入綺戶
仍邀竹月下銀塘花邊錦炬參差影樹裏星毬點綴光
却笑病愁難料理臥憐簫鼓競更長

其二

繁燈吐艷鬧仙堂寶瑟交橫繡幄傍不夜火城通桂館
無風香霧起蘭塘芳筵特敞金吾第勝侶魚依玉樹光

何事匡床予獨倚新詩引興故為長

病後徐錦衣重招燈宴再用前韻二首

華宵勝集阻春堂綺宴重叨上客傍妙舞百迴臨霧樹
繁燈千簇出煙塘仙人閣吐神藜燄漢女珠搖水珮光
換席翻嫌寒漏促欲教短夕向君長

其二

醉吟北斗掛虛堂起視明河絳闕傍點座銀花輝別館
鉤簾火樹炫回塘屏間霧隱三山色檻外星浮一水光

擬共昇平傳樂事笙歌齊慶帝年長

鳳臺懷古用李太白韻二首

把酒高臺詠昔游千年事往水空流青山故闕秦旌纛
碧草今傷晉苑丘市柳彈絲迷舊磧川霞飛綺映前洲
浮雲白日終難蔽寄語昔人暫破愁

其二

鳳鳥不來人自游古臺高俯白雲流銅駝詎臥三吳陌
石馬寧嘶六代丘岸幘他鄉憐短鬢拂衣吾興欲滄洲

從誰共倒長江水為洗英雄舊日愁

蘄水李居士承芳余先世故交也往余過其邑迫
行不及一訪茲辱遣介二子不遠數千里謁余

白下因歸作此寄焉

四世通家幾閱年吳山楚水邈風煙却慙間歲雙旌過
不及中林半刺傳二妙喜看承鯉學三湘遙此寄鸞牋
何時獨鼓洞庭楫徑訪雲巢赤岸邊

吳山人長吟閣用韻四首

恐使詩情渾放閒故移吟眺入孤攀春光澹蕩煙中寺
暮色依微雨外山柳換舊條當戶碧竹垂新籜滿林斑
也知市巷同三徑定有求羊數往還

其二

塵土誰能便息閒羨君林臥足幽攀長吟未厭聊題閣
大隱元知不在山春至小園花有暈人稀深巷蘚成斑
祇應賸買逋仙鶴水曲城陰自放還

其三

借問山人有底閒時將小閣恣躋攀捲簾但聽花間鳥
開牖更看湖上山木榻每通潮氣潤竹扉仍積雨痕斑
何時獨抱孤琴往共坐鹿門月色還

其四

幾欲相攜一借閒私嫌俗駕混招攀芝叢自長憐深谷
桂樹誰同賦小山仲蔚逃名門併絕君平辭世鬢從斑
翻慙倚檻攢歸思目送高天倦鳥還

送少司馬石公赴鎮沅臺

十年戎馬驅馳靜萬里山川節制遙蕃漢車書通月窟
西南君長望星軺松門關絕元封使銅柱功成建武朝
幕府今陳司馬法征輸無用到三苗

春日過壽許奉常母夫人誕辰因留賞牡丹席間
限韻二首

閨苑曾推第一花天香今散洛陽家紛披自捧當庭露
爛漫還舒滿院霞不畏風欺吟鬢短從教月上醉肩斜
年年花下長為壽持向瑤池宴裏誇

其二

持向瑤臺宴裏誇穠芳
原自擅仙家却憐此夕同沾醉
猶似曲江共看花
席換新醪邀片月
盃搖殘景駐輕霞
春葩故厭繁霜髮
強折嬌枝戴帽斜

魏公西園賞牡丹次康少宗伯二首

冶城西畔魏公園
仙客同開上日尊
花繞複亭深隔市
柳藏幽徑曲成村
簾櫳晝啟春陰靜
睥睨晴通野氣昏
向夕不須仍秉燭
繽紛蘿月映階繁

其二

未說昔時金谷園且傾今日看花尊
風流合竝洛中社勝絕元稱白下村
展席醉延池月吐開軒吟對水煙昏
百年嘉集應難數莫厭歸燈擁路繁

太常後廨牡丹盛開少卿王子難招飲
有作次答
二首

誰種名花滿曲臺天香應自洛中來
却憐宴笑人非故漫對穠芳首重迴
十日繁開霞作障一欄紅艷錦成堆

清平詞調傳今古妙思多君綺句裁

其二

二百年間有此臺仙僚幾共看花來若為獨對吟堪惜
更著多情夢與迴香珮應遺華月浦玉姿定化彩雲堆
嬌葩秀詠憐相競知是天孫麗錦裁

徐公子宅賞牡丹次孫大宗伯二首

東風吹暖散千門浪蝶狂蜂亦自喧公子名花開別院
佳人錦瑟對瑤尊宋中車馬交梁苑洛下衣冠盛白園

此地仙僚時恣賞春光何羨樂遊原

其二

揚子傳奇浪載尊陶公卜舍漫辭喧能娛病客三春日
獨愛王孫十畝園憶昨看花同曲水只今好客幾平原
韶華況過清明雨管占芳菲信爾門

送李都督赴召北上

玉節金符控五兵將軍才氣振邊城十年瀚海嫖姚幕
萬里瓜沙定遠旌此去龍韜陳帝闕即提虎旅按神京

東南組練滄溟外長遣鯨波碧嶠平

李自南都
赴召巡京

壽陳進士母七十

白髮金鈿綵綬垂脩然阿母任瑤池人間青鳥若為降
天上碧桃遙爾思數徙孟隣人識宅東征曹賦世傳詞
靈萱歲歲搖祥霧指點朱粧照玉卮

送大鴻臚孫君考績北上

水國煙霜澹遠林清尊惜別古城陰懸知劍珮燕京去
仍抱江湖魏闕心倬直幾經違禁籞同袍今喜盛朝簪

送君余亦搖征旆未用離絃奏越吟

余北考在孫君後一月行

送劉君赴漳州經歷

煙火相隣千室村上卿劍履在名門
海邊作幕憐君往兵後驅車問戍屯
此別柳條難折贈到來梅藥定開繁
求仙莫學南昌尉好詠甘棠帶召原

送懋中胡編修還朝

鷗銛新試冶城隈鳳彩真輝江上臺
吳地詩篇傳陸左漢京詞賦說鄒枚
龍灣日出牙檣種燕渚風生錦席開

此去英聲蜚館閣定知述作冠羣材

趙太僕脩醉翁亭成招游有賦二首

醉翁亭倚碧山幽麗構新成此共游
一代文章傳述作千秋祠館寄風流
水寒石窟魚能聚客散林坳鳥未休
欲訪瑯琊更深處野風吹暝下前丘

其二

前輩高風宇宙垂昔游山水動遐思
絃歌已併煙雲散文采空遺草木知
白髮吾衰憐幾過蒼林翁醉憶當時

忻逢舊日清吟侶漫引香醪注玉卮

庚申元日彭城

南天旭景動千扉北極祥光轉禁闌
岸雪颭風將臘換城雲裊樹帶春歸
嵩呼漫拭常朝履華祝遙開舊賜衣
二十餘年金馬闥江湖何地報恩輝

上元先夕承山宋使君移酒過叙座中因憶金岳
州有作

二十年前省籍同江湖行迹幾西東
三春作客風塵裏

千里懷人月霧中
傍席星花紛散綺
輝堂火樹爛成虹
明河逸思逢之問
漫賦瀟湘寄遠鴻

河間道中

倦客風塵未息機
雙旌馬首起殘暉
潯河水落魚龍靜
汭澤春多雁鷺歸
黑髮虛名慙敝帚
青山獨往泥征衣
芙蓉玉筍菟裘計
老大空悲願每違

晚春高唐道中得丁中丞朱方伯書有述

細麥新桃帶遠林
驅車古道暮煙深
三春倦客江關思

千里浮雲低陰片月幾懸清夜夢尺書欣見故人心

東南倚劍同孤抱

時適有南都之聞

悵望空為梁甫吟

擬道齊河招渭濱憲副為岳游不果渭濱爰追會

於高唐既別詩以謝之

天畔芙蓉若處撐山中蘿蔓漫相縈尚平婚嫁非難畢
李白仙求苦未成五岳壯遊虛夙志三春行樂阻孤征
題詩寄謝東齊客為訊芝叢幾谷榮

寄和曲巖老人并其子白玉詩有序

余友高陽許子自吳門訪余白下為言震澤之墟有
曲巖老人蔡叟者行年八十餘矣屏居衡茅超然抱
榮啓期之樂二子躬執爨為養甚孝敬并老人咸鰥
守不更娶所居無長物菴幼相對聚蒸如也與人交
一介非其義弗取予焉嗟乎世衰道薄束紳黼襲跼
蹐行者何算有如斯人余耳目所及其幾哉矧一門
潔脩靡玷缺即古稱龐德公輩固未見仍世嶢然不
滓垢若是者余方涉濁淖末流不能褰裳獨引顧久

與掘泥揚波視斯人蓋負愧多矣老人暨其子伯玉
竝好吟許子持示余二韻七律余感其志因許子和
寄二章覽者不將有取而賡之者乎

曳杖行歌雪滿顛世人徒羨釣璫年歲寒桂樹聊攀倚
春晚蘭苕故秀娟賣卜不張吳市肆垂綸長放洞庭船
冥鴻世網誰能那我憶高人潁水前

其二

袷褐山中自據梧鷗鳶何計嚇鵝鵝九歌楚澤從漁父

五噫都門識賃夫，饌客春盤饒露筍。供厨晚飯足霜菰，雲中養穀難成匹。錦翼花傍次第呼，老人子伯玉時有飼鷄之詠

送湯納言赴貳北太僕

勞歌載詠魯駟篇，諫牘曾宣帝匭前。憶誦凌雲慙狗監，幾占貫斗識龍泉。公試南宮余謬校閱得間讀其文三千駉牝看騰柅

百萬攻駒待牧邊。盛世竒猷君合展，吾衰但贈繞朝鞭。
送葉廷尉赴召北上

三年省牘鏡中開，幾閱玄湖隄上槐。卿月忽懸鵲鵲觀，

法星猶照鳳凰臺歲殘鴻雁平沙集春轉龍蛇大澤迴
莫笑公車無結襪釋之今召漢庭來

辛酉元日

素髮詞垣老侍臣周南留滯六年身幸逢四紀休明會
遙慶三元正始辰緹琯律傳仙黍應青陽景轉帝奠新
蓬萊御氣通璇極稽首祥雲是北辰

留都迎景王駕并候謁陵次康太司空韻二首

紫鳳簫吹白玉京遙欣緹駕降仙瀛河山氣擁菁茅社

日光懸磐石明春暖岸花迎羽衛雨晴江草冒華英
神明帝胄同休厯佇迓璇衡麗正平

其二

聖日重輝頒八方中天玉几坐垂裳朱維節引蛟鼉避
紫宸宮開龍虎翔藻錄九傳承祚永蘿圖千紀應時昌
祥麟紱角瞻仁表茂澤宜流江漢長

省中春思示孫宏詡二首

省閒宴坐自虛超閑閣春陰在柳條懶以詩書酬白髮

共誰事業振青霄門稀車馬心同水家在雲林夢亦樵
寄語舊山相狎侶不教巖桂負先招

其二

水榻經旬不掃塵翛然隱几識天真却觀莊室虛無物
始信僚九動有神傍席禽魚能悅性映池桃李自交春
不將幻迹辭拘礙何處堪安久病身

奉壽少司寇楓潭先生六十

蘭陵向接飛鳬履楓陞還傳搏隼章四海賢名歸鄭汲

諸生經術重韋匡行藏物外心同水六十人間鬢未霜
看取卿垣新月麗知懸華業照旂常

晚春同許奉常胡太史赴陸生牛首之約二首

凌晨鳴雨颺霏微過曙輕陰散曉暉一入名山堪掛綬
況逢勝侶與褰衣草間石訝羣羊起林際風邀獨鳥歸
醉倚僧筇忘去晚滿村雲霧失郊扉

其二

幾年不踐城南路岸嶼煙曠着處迷半嶺寺藏蘿徑密

一谿橋傍竹棚低病餘筋力愁車馬老去登游厭杖藜
賴託高朋招引興春風吟眺徧招提

答石城奉常六十自述之作四首

樞副中年已棄官步兵長放酒盃寬從知黼閣持衡貴
未換繩牀隱几安何地不宜扶老杖幾人能賤進賢冠
輸君密罷任公釣閒戲珊瑚碧海竿

其二

白髮懷人思不禁舊游朝士不抽簪夷門誰引侯生轡

洛市徒誇季子金
天遠蘭叢翳浚谷
歲殘木葉下空林
後凋松柏知能耐
暗閱風光若處深

其三

盈虛久向樽壘失
來往魚于杖履輕
白傅自耽香社好
王丞況築輞川成
身辭北闕朋游少
家傍南山語笑清
見說食霞曾受訣
夙心元與赤松盟

其四

庭交雜藥垂新錦
戶蔭疎榆點細錢
杜老詩篇渾遣興

尚生婚嫁祇隨緣東征校尉愁蠻瘴北伐嫖姚畏虜煙
老去高陽厭奇畫不妨長共酒徒眠

送內山裴公表賀便省

江城乍過黃梅雨驛路遙吹碧柳風錦節欣隨朱旆入

斑衣況侍綵輿同銅龍舊署承廬側

東坊房近東直廬

金馬新

闡秘閣東

學士館今新成在東閣南

若見昔時鳴珮侶為言天漢竚

來鴻

壽大司馬李公六十

仍歲斗垣迴舊柄入秋壽極轉新躔裴公業盛平淮日
召伯功尊詠漢年麟閣畫圖標日月龍洲釣艇寄風煙
亦知報國心長赤肯擬乞留訪列仙

少司空蔡子木考績北上

學士詩名傳慶厯中郎經術載鴻都從知蔡氏文章盛
又見司空藻潤敷六郡良家懷節制三河閒府慰流通
古求政學優難竝伯益于今贊帝謨

重宿三茅道房二首

大茅峰下重來路四眺雲霞感昨吟
浩劫樓臺還上界
高真巖洞自中林
三生誓記丹心在五岳尋仙白髮侵
幸謝舊盟猿鶴侶移文莫借北山岑

其二

夙籍幾年辭紫府幽齋昨夜夢黃庭
玄筌未託高丘士
道笈長緘大洞經
白日騎龍謠已幻青霄化鶴事
空銘茅君近在塵凡境咫尺清思隔窈冥

史翁七十二首

早從禁省拭華簪遂向亨衢稅舞駢吏部文章傳海內
儲垣星斗動天南花宮習靜人辭席竹院安禪佛共龕
偕問焚魚甘白首巾裾何用媚烟嵐

其二

玉陽新閣繞千巒秀挹仙霞臥可餐紫壁度雲移錦繡
青芝過雨長琅玕金房定啟千函秘玉竈應成九轉丹
黃髮後車還擬載釣璫入卜迂西磻

寄壽汝止第六十

攝提歲紀周天歷汝後吾先憶並生六十年華空斗杓
三千才藝自經籬垂階棣萼風前整厭檻荆花雨後明
却歎曲塘遺隴在歸歟長恐負同耕

癸亥之夏過休寧同宗川令尹程吳二友生游白

岳二首

萬丈丹梯轉碧霄上清樓閣俯岩堯間將令尹青牛駕
共赴仙人白鶴招興結煙蘿成綺構思傳雲鳥變簫韶
平生竒覽無茲境肯厭千峰杖鳥遙

其二

芙蓉玉削裊蔥菁，錦磴千盤入窈冥。
帝敕三姑辭寶輦，仙招五老戲瑤屏。

五老三姑寶輦皆峯名

中林誰指無媒徑，上界

元遺不死庭。欲向黃冠借幽榻，焚香趺坐了丹經。

寄祝甘蓮翁壽詩

黃髮青山杖履前，武公抑訓世爭傳。
人間八十桑榆旦，海上三千桃熟年。
自得精神元擬聖，不教服食也堪仙。
紛紛老壽多誰數，我憶風流洛社賢。

送茅參軍報滿得省覲

計書早捧趨庭迅綵服
鯨承獻歲新南極星辰
忻在目
西湖雲霧暗相親
梅占白舫吳堤暮柳撲
青輶薊驛春
歸報東山難久臥朝廷
方憶舊詞臣

初春從諸年丈西園讌集

即擬西園作灤西何妨
錦障數衝泥八旬雨雪
愁車馬
獻歲風花負品題幸有
早梅迎客笑況多好鳥
傍林啼
從知樂事緣高侶底用
接羅倒著迷

同年再會西園用林司空韻二首

水竹深通曲巷迴，名園重迓上卿來。
紅顏謬並金閨籍，白首欣同畫省盃。
雨雪初春交漢苑，風雲北極望燕臺。
亦知牘事無多在，懷抱因君故好開。

其二

結駟西園踐夙期，郊原春凍見花遲。
生憎風霰飄殘夜，不放笙歌沸曲池。

時欲觴舟
因雪阻

漏定月華微，映座燭殘林。

影暗搖卮握，君秀句吟難就。安得羊何共和之。

木末亭用韻

亭聞木杪人欣勝，徑轉雲端客共燈。
佛宇疑藏無色界，仙家似在最高層。
孤煙晚起聞香飯，斜日林疎見鉢僧。
忽憶當年題塔會，清尊今集幾英朋。

答姚秀才

幽棲臥病烏皮几，留客小堂文行尊。
久以宦游縻歲月，每於春至憶鄉園。
南宮地切銅龍署，北斗城高金馬門。
一出楓宸驚十載，江湖雲氣自朝昏。

送王中丞致政南歸

諱士翹

入春風雪轉陰霏斗酒江亭悵獨違
迎憶凍花猶閣閣
颭旌寒柳自依依
新盟白鳥煙波濶
舊業青山草樹稀
濟巨期君君竟往
吾衰空憶釣魚磯

追挽蔡居士

大隱誰言遠市朝
我思高士竟難招
弔憐楚老哀同劇
薦憶庚桑報自勞
舊木蕭蕭圍宅冷
長川泯泯去人遙
鄰家故有喬林桂
何事奇芬阻碧霄

壽周君六十

何嗟杖履老中林六十悠然抱膝吟
跡學南山玄霧隱家藏西崦白雲深
遺安自得龐公計積果應成竇父心
歎我衰遲縻棘省因君渾欲謝朝簪

和周中丞喜致仕報作

曳珮遙辭尺五天息機且問漢陰田
洛中舊盛耆英侶海上元多服食仙
定擬淵明三益詠

江文通有擬淵明田居之作不

傳平子四愁篇此歸訪學人非少白髮還堪比伏虔

得七峯符卿書并示往歲見憶之作叙感二首

四海論交壯齒前多君高誼薄雲天鶯花春寺移尊日
鼓角秋城請劍年往事傷心憐白髮清詞寄憤感朱絃
棠谿近歲傳雙鯉未報瓊瑤思屢懸

其二

奕葉猗蘭振代光君家兄弟大芬芳誰因采珮思王者
自詠迷陽學楚狂昨憶尺題存篋笥何時斗酒說干將
定知鴻鵠翔天漢羽翮無勞弋繳防

送考功蔡郎中提學閩中

海上煙塵漸息驚閩中隼射化蠶耕青衿絃誦沿郊有
白屋童冠着處迎曉館微風開帙軸春堂細雨偃匏笙
試探皓首橫經者誰解鏗然舍瑟情

春日同年西園集二首

花前並劇三春興竹下聊為六逸吟

同年時
六人

弄艇共看

新草色開軒更坐古梅陰幽人似隔蘭若渚隱客誰招
桂樹林徙倚孤亭遙騁目高天雲霧暗西岑

其二

黃金榜下看花侶，白髮林中對酒人。
四海漸看同輩少，百年轉憶故交親。
桃低淺頰疑舒笑，柳放新眉似學顰。
幸藉揮絃娛落景，可辭秉燭照歸塵。

詠石翁太常宅牡丹

傾城名艷出塵寰，獨立春風意自閒。
素月故應留霧珮，青山長為掃煙鬟。
瑤池若見堪停宴，洛水如逢可待扳。
若怪太常終日醉，白頭端借駐歡顏。

對花詠懷

九十春殘花漸稀
追歡那惜典春衣
況逢勝侶能同興
忍對芳叢不醉歸
往事徒傷金谷在
名園共惜洛陽非
破除萬事聊尊酒
儘判風花作意非

登泰岳二首

峻岳高攢海甸標
霞光千里蕩扶搖
為尋古帝登封蹟
來赴真仙汗漫招
縹緲孤陰生大野
虛無靈氣變叢霄
金繩玉檢從誰問
獨立高丘記往朝

其二

夙憶名山北岸冠
天風海日振穹巒
金庭景倒三千界
玉棧雲飛十八盤
九節自攜青竹杖
三花誰掃碧霞壇
脩然下覽衆山小
矯首蒼茫六合寬

夜宿雄縣館枕寐忽得詩四句若兆余南歸之讖
者後三日果聞報因足前四句成之

松菊荒廬舊徑微
朱衣今喜謝朝扉
聽聲謬曳尚書履
僂直叨承學士闥
抱葉流螢紛吐焰
驚枝宿鳥暝爭飛

長鏡歸去豈無計黃獨山中秋正肥

憫忠祠別門人張別駕仁夫

十載孤蹤隔禁扉三秋重與故人違
君才尚滯黃龍塞我夢先飛白鳥磯
紅葉儘教飄客路緇塵肯使化征衣
平生意氣惟張竦願以經書共載歸

范兗州出送濟南上留別

許身空自比南金未報清朝愧陸沉
出處龍蛇誰定跡去留天地亦何心
高賢能解孤懸榻舊客那傷變徵音

迴眺浮雲千里色漫彈雄劍助哀吟

寄贈祠卿徐太守

五月荷花開鏡湖使君曾駐畫輶無褰幃吏傍青山出
露冕人交碧樹趨舊雨幾年勞展牘停雲此日憶專符
共言聖代尊良守賜服行看耀弩驅

寄張玉屏員外

李膺才氣故無儔歸臥江東問幾秋偶以黃花傳麗句
宜因萼菜寄風流沙邊雲霧深宜隱谷口泉蘿靜可留

遠想青春行樂處漁竿長自弄扁舟

送泰和祝令入覲

朱絃快閣擅風流尚憶當年舊縣侯共羨美才成製錦
每多異政在歌裘

時侯因捕巨盜致訟

歲殘鴻雁遵沙集春轉龍

蛇起陸游定擬飛騰易霄漢賢聲預已達宸旒

貞烈祠二章

有序

序曰邑譚婦趙氏事赫耀人耳目垂三百年當其時
海內遭極變笄褱之流能以烈節著奇蹟者獨婦與

嵯縣王婦二人耳嵯縣死臨海之清風嶺好事尚多
遺論嗟乎燕京紫市之從容豈誠後崖山沉海之抗
決哉余故謂二烈易地則皆然不可差殊議也抑是
時余邑起議勤王以應文信國而罹夷滅者蓋八族
故烈婦一門駢死靡孑遺而郡邑掌故卒亡所著載
哀哉茲祠肇建於國初令長四明烏侯斯道弘治間
中丞錢塘張公本守吾吉時特以聞朝詔賜今祠額
春秋致祭咸有司蒞事其烈蓋光顯頃廟學既遷余

諗於前邑長東吳馮侯符言烈婦實有功先聖師之
教矧血影在故禮殿前楹中不可厭媒失敬盍移祠
據廟戟門故址令碑影當其後覆以一亭庶永久無
毀壞馮侯是之顧祠位雖正然其宇規式不甚稱今
仁和陳侯至禁他役之擾民者獨加意茲祠命工亟
改治之於戲崇風化以振末俗侯其識政理之先要
哉余訪祠舊刻詩文多無存僅獲殘錄一帙致侯爰
述昔今所歎感者成近律二章附請正云

鼎移誰不污風塵一婦臨危獨隕身
生誓丹心寧負義死憑碧血與傳神
八碑祠廟高天近千仞宮牆瞰日新
今古烈名疇擬並千山崢嶸對嶙峋

其二

痛哭中原二百州東南降懺忍包羞
勤王八族兵先殪死賊一門婦可留
伏臘貞魂長禮殿江山遺恨漫旂裘
天常未向中閨絕正氣吾邦昔所流

贈鄭節推二首

使君節旆驚初顧野老冠裳訝倒將敢以鑿坏辭世混
聊因抱灌托機忘青蠅久向林皋失黃鵠終飛天漢長
共說鄭卿憐汲孺未妨樽酒狎滄浪

其二

三鱣早兆知先應雙鯉忽傳問所如江上未追元禮棹
山中空策少游車芙蓉秋老芳誰采鴻雁天高影自疎
欲贈夫君千里道翻持雜珮渺愁予

贈汪君得冠服詩

買斷清谿十里潯結廬長占古潭陰共誇卓氏車僮盛
何似朱公計策深白髮冠簪新寵數青春桃李舊家林
懸知謝却樊籠絆翠壁丹梯從爾尋

萃勝樓追和東廓先生二首

白首尋春若處深青山此地且投簪悠然獨立川雲際
自得一村魚鳥心乍集童冠思擬勝相宣金石感同音
請看不舍如斯者尺璧寧將抵寸陰

其二

古樹深谿相對清曉踰孤閣玩虛明數圈誰洩圖書秘
萬古元儲河洛精寂寂朱絃憐輟響嚶嚶黃鳥悅求聲
新知自振風鵬力可使扶搖易息程

東山小集次答李學諭二首

赤紱元慙鼎貴姿青氈聊憩共儒師逢時恥獻河東賦
述往欣傳鄴下詩杖履此歸間可理谿山時眺興偏宜
相將更作禪林集笑拈庭前柏樹枝

其二

吳市行歌非客姿蘇門長嘯亦吾師因嗤左氏十年賦
不及陶家五字詩祇苑繙經君獨悟蒼林陪座我兼宜
歸舟醉繫梨花月玉影離離綴夜枝

別歸泊舟梨園快
甚故末句及之

戴君六十詩有序

小石戴君少以才名著鄉校中苦數竒不遂科選乃
脩孝友之行以信之家而式之鄉閭人莫不敬且頌
云頃歲余與君伯氏郡守君議建鄉社以導化里中
衆推君為之正俾領約事君迪率有方里中無少長

咸歸之或爭曲直得君一言即帖帖服可不謂能以
古道變今俗也耶今年九月二十六日君周六十之
辰社會諸君並乞言為君祝噫嘻君之賢衆無間然
矣余歎長倩之達不能易仲方之善化故為賦七言
四韻效壽獻焉

傳經幾試三千牘閱世今周六十年為士豈誇長倩達
入鄉應信彥方賢芝含晚媚朱霞絢桂捧秋陰碧露懸
醉引斑衣供戲舞不招鸞鶴也堪仙

送廬陵龔大尹北覲

渤海單車漢治傳風流遠裔振茲年青霄自下王喬舄
白日長橫宓子絃此別雙魚慰何日相思一雁下遙天
漢庭恒召洛陽俊宣室懸知席易前

送張鳳林太史竣使還朝

幾年歡綵曠萱除玉節遙將慰筍輿九折那迴邛阪馭
三長仍載漢闡書江亭去雁依山棹驛路遷鶯引使車
往識倘垂幽側問為言久病臥相如

送應少尹提牧留京

黃梅新雨漲長川別思遙將白下船
漢史廉丞今見汝蒙園傲吏昔稱賢
三千騾牝歌駟日百萬兵車治賦年
淵塞似君知獨少圉人數富定無先

和答劉少衡見寄之作二首

先皇寤寐建豪英鳳德傳歌感昨情
廷尉豈堪榮翟氏公車聊復重王生
風波畏路同君涉雲水閒田恣我耕
南極一星虛爾映六符遙願正台衡

其二

楚山秋色突千尋西壓雲陽紫氣深炎帝巡車誰訪昔
朱方火鳥自傳今飡霞未愜招朋興捧日應懸報主心
却憶汝南吟弄意羞將白髮對殘經

送虞少尹督餉南都兼之官衡邸

三年古縣鳴琴治千里長江轉餉行書劍不妨隨客棹
煙花聊復憩仙城鄒裾豈憚王門曳蔡屣誰當賢館迎
懸想過家應歲晏片帆應共北鴻征

衡藩之計在改
春未故及之

壬申元日試筆

示弟
汝止

白首先朝舊侍臣焚香北望拜楓宸
抗言屢及安危計憂國曾忘寵辱身
九葉幸看昌聖歷三邊況喜靖烟塵
論思未乏巖廊俊歌詠宜歸畎畝人

答劉敏卿文學

憶昔詞垣忝近臣六箴慙未獻丹宸
敢期釐室移前席虛擬探環是後身
老我欣欣依舊業諸公衮衮抗清塵
枌榆社裏閒相過不羨東西南北人

壽湯君六十

諱子儔別號方塘

鬢髮蒼雲入鏡垂，計然心力未虛衰。
人間六十桑懸日，海上三千桃熟時。
員嶠琪花含麗景，方塘錦荇媚寒姿。
知君澹蕩煙泉意，不向商巖問紫芝。

送司訓余君之官衡藩

江門舊釣沈煙水，繡枕金針豈度人。
清廟朱絃堪歎汝，高車白壁易生塵。
路經稷下衣冠集，車過湘中草木春。
訪學從誰一莞爾，臨歧延望獨傷神。

甘揮使膺二臺獎檄

淮鎮初傳走餉符江臺遽報獎賢書雲中魏尚才元贍
許下韓宏計或如謀績擬鑄金虎券轉輸不羨木牛車
新游袞袞繩前武吾老菟裘望不虛

送范宮允竣試還朝

錦帆高颭石城秋千里長江湛碧流舊識沂公懷素志
早同范老負先憂掄才自出驪閑品得士寧資狗監謀
況有微言裨啟沃應知忠志動宸旒

送何官允竣試還朝

大復聞孫擅楚材久於超乘見龍媒竭來霄漢甄多士
遂有星躔動上台講業定招沂上士驅車還訪沛中臺
此行不負周南使好遣風雲入壯裁

壽許母夫人五十

壽宴初稱魯頌詞祥芬正韓竇庭枝人間青鳥此應降
海上碧桃熟不遲推莫定知陳易衍注年端合叫仙期
諼花歲歲開堂北長有春光媚晚姿

王巖潭太守以所刻詩訪余讀之有作

青齡北苑看花日白髮南宮對酒年
四紀神交空海岳三山仙路杳雲煙
新篇招侶丹霞外舊句懷人碧草邊
少壯英游今幾在不知誰為聽朱絃

詠省中舊鶴詩

十年舊鶴喜余親奇格蹒跚信少塵
祇憶江湖儔侶隔漫憐霄漢羽毛新
虞羅蔽日虛施巧仙路乘風不易馴
借問西池故鵷鷺胡然茹下慕游鱗

壽奉常石城許公七十

青袍北去看花日
赤紱南歸賜杖年
共說掄魁違鼎鼐
却成平地作神仙
謝公行蹟江東著
白傅風流洛下傳
愧我舊垣叨再入
虛持壽詠擬朱絃

三舍友有次象山兄弟舊韻見贈者語不無軒輊
先賢意因次其韻復之并以諗之師泉翁

寂然元不着
哀欽萬古誰
窺天地心地濶
風鵬常大海
天空野鳥自
高岑支離學
辨成絲密易
簡功虧懼陸沈

却歎建臨無二轍鷺湖底事戾先今

有懷孫養吾舊友作

十年相見重相違況對江亭風雪飛
病客久為長孺臥
懷人誰共子猷歸好鳴天上球琳佩
莫戀山中薜荔衣
春近魚龍紛變化未應霧豹隱寒暉

送任光祿赴承天幕府

仙客春帆徑楚波帝陵佳氣鬱崇阿
郢中白雪逢知少
漢上彤雲入望多此日南冠聊鼓枻
他時北闕遲鳴珂

齊巖趙浦風流在擁傳休煩問釣養

五日命舟過遊金山寺郡守林君追至遂開宴江
天之閣移席觀競渡戲二首

五十年中幾去還塵纓茲許濯江關天開鷺境蒼濤裏
地出龍宮紫霧間舊識高僧驚滅度新成危閣漫躋攀
衰顏自照冷泉水愧汝清湍白鳥間

其二

羽旆參差擁岸筵水嬉對競暮潮邊却憐鶴髮揮杯日

猶記龍舟侍宴年
雲水三天周梵界
風帆萬里迅歸船
追歡莫問前朝事
南北干戈化管絃

吳門別秦丁二賢

一樽遠慰勞芳棹
千里相懷感故人
廊廟喜拋蒼玉珮
江湖聊乞白綸巾
鴻才陸史終應達
龍性嵇生不易馴
此去翩然黃鵠迹
孤飛無復礙矰緡

甲戌夏再過武林諸君招游西湖感興二首


一別西湖已廿年
舊游林壑異風煙
蘇公堤上花存幾

林逋宅前山自妍半壓荷灣猶舞袖已殘柳岸尚歌絃
兵戈忍使繁華破今古清波漫畫船

時經倭變蘇堤
桃李盡伐云

其二

憶乘使傳此經過四十春風轉綠荷人世自更新宇構
湖山不改舊巖阿公孤祠院蒼苔滿侯戚墳園紫蔓多
往余庚子歲居湖上最久其時陸祠郡墳猶未作
也余再過之二祠墳新麗復荒甚矣為之興歎
共君成劇飲平原曲沼竟如何



洞麓堂集卷十